

V I C E G R A D V M. Plindeburch.



V I C E G R A D V M, Germanis Plindeburch, Castrum vetus, ad dexterum Danubij latus, præcelso in monte inter Strigonium & Budam medium situm obtinet, quinquaginta annis in barbara Turcarum potestate fuit, munitum & validum est, copiosa armaturæ prouisione instructum, adeo etiam, vt cum ante annos quinquaginta Strigonium à Turcis occuparetur, duobus adhuc annis ipsorum tyrannidi Christianorum zelo, & defensorum virtute, restiterit. Tandem verò, cum Buda & loca vicina hostium potentia cederent, in eorum etiam potestatem deuenit. Quibus Anno M. D. XCV. die xxi. Septemb. diuina miserante gratia rursus ereptum nunc à Christianis occupatur. Ad montis radices iuxta Danubium, opidum est, frequentibus Turcarum deuastationibus, & incendijs deformatum, quod Vngariæ Regibus gratum à curis recessum quondam præbuit, quos aëris solique clementia & salubris amœnitas eò frequenter pertraxit. Nam vineta, pomaria, horti, pascua pingua, virentia, & amœna, omnis generis delicias, hic, vberrima copia præstant. Id etiam ingentes regionum ædificiorum ruinae hoc loci testantur, quæ regiam & priscam magnificentiam arguunt. Et inter hæc, equile visendum, sexaginta, & plures equos admittens, ex marmore & secto lapide, adeo politè fabricatum, vt videntes in admirationem rapiat. Ex opposito, opidum est Maros, à Christianis sub tributo & cruce inhabitatum, qui Ecclesiam amplam cum turri conspicua, & in ea publicum Catholicæ Religionis exercitium habent.